

皇明嘉隆疏抄

戶部尚書臣馬森等謹

題為明會計以通時變預遠圖事山西清吏司案
呈查得浙江等十三布政司南北直隸各府州
地方田土通計夏稅歲額除奏豁并摘撥莊田
及農桑絹絲人丁折絹及本色絲綿各存留本
處與解納

內府外實徵起存麥米共四百六十二萬五千七
百五十七石九升八合零內除京庫小麥三十
四萬二千石每石折銀二錢五分係歲解承運
庫之數與坐派南北二京各監司局及內外邊
鎮堡各倉庫本折色并絹布豆折等項俱有項

下解納外止有派剩小麥一萬七千餘石每石
折銀一兩共一萬七千餘兩并各絹布折銀九
萬一千六百八十九兩四錢四分秋糧除奏豁
外實徵米二千二百一十六萬四千七百一十
七石八升七合零又除存留及地畝花絨存留
本處并起運本色外實該起運秋糧米一千三
百一十萬一千五百四十五石一升三合零內
該歲解承運庫折銀米三百七十一萬八千九
百九十二石三斗七合六勺零漕運米四百萬
石南京各倉米一百八萬三千二百八十七石
零抵斗黑豆二萬六千三百一十六石零

內府各監司局光祿神樂觀及在京

宗人等府部院等衙門并南京各府庫等衙門坐
派米豆約共五十六萬六千九百一十一石九
斗零又內外各馬房倉場邊鎮各倉口坐派民
運本折不等外只有派剩米二十四萬二千五
百七十五石零每石折銀七錢六錢不等共該
折銀一十五萬八千四百三十三兩零京庫折
色布銀三萬八千六百一十三兩又帶徵馬草
內除存留及起運各場外該折解太倉庫草七
百一十九萬五千二百三十九束折徵銀三分
五厘并南草三百九十六萬七千九百包每包

折銀二分二項共該銀三十七萬八百七十兩
零在京五草場并備派

內府會無稻草等項折徵寄庫銀共約四萬五百
七十八兩七錢四分此外各衛所府縣屯田地
畝牧地子粒租銀與各省府戶口鹽課鈔關船
料商稅等銀應解太倉庫者約歲額共二十六
萬六千九百八十兩零通計歲收太倉庫銀約
共不過九十八萬四千一百六十四兩零內除
各鈔關本折輪收歲該一半及扣二項扣省等
銀共一十一萬四千五百七十兩外皆奉

詔蠲免十分之五又少銀四十三萬四千七百九十

七兩零及香歲支公侯駙馬伯祿米折銀及在京文武百官京城內外各衛所官軍勇士折俸折絹布鈔冬衣布花并各營將官家丁軍士馬匹折支口糧料草

內府各監局會無買辦棗兒等項神樂舞生夏衣冬麥太常寺猪價

欽賞番夷人各衛所軍伴雜役折米銀在京五草場召買草束商價共約歲支銀一百三十五萬餘兩九邊近年發主客二兵年例銀增至二百三十六萬餘兩以上京邊通共用銀三百七十一萬餘兩除前歲入折糧等項銀九十八萬四

千一百六十四兩零半兩淮兩浙等處各運司
等衙門歲解鹽課共約一百三萬餘兩通融支
放外此外尚少歲支銀一百六十九萬五千八
百三十六兩零並無坐派年年撥括已竭今隆
慶元年奉

詔蠲半又少去銀四十二萬四千七百九十七兩零
通計歲用額數實少銀二百一十三萬零又查
得九邊各鎮倉庫歲派山東河南北直隸順天
等八府及盡山陝二布政司全省之稅糧民運
輸納其本折約銀三百六十四萬一千五百五
十兩三錢二分七厘今奉

蠲免十分之五則又少民運銀一百八十二萬七千七十五兩一錢六分其各鎮軍士月支升合俱不可少以上通共實少銀三百九十五萬一千四百八十兩零無從措辦及照先為計處蠲免錢糧以濟邊儲以裕

國用事該本部題以隆慶元年奉

詔蠲半通計歲入之數較之歲出不敷數多隨行參酌事宜條為四事已經題奉

欽依通行欽遵訖但恐撥括未得未能盡如原議之數而各邊支用欠數尚多呈乞轉行計處施行案呈到部看得計補蠲免乃一時之權宜而經

久之謀尤當酌議預圖臣考先臣王瓊任戶部尚書因宣府鎮奏討缺少增添軍餉奏稱弘治年間各邊歲發共止四十八萬兩今該鎮稱增添官軍原無會計議行勘議別處然猶一鎮耳未聞如今增至二百三十餘萬也及查宣府鎮原額官軍止五萬八千六十一員名今增至八萬八千八百七十七員名而凡屯糧秋青草束皆日漸耗以至無徵即此以例他鎮此餉之所以日增而戶部實為難繼第先任戶部諸臣未有以陳於

先帝之前而言官并各部院邊鎮諸臣亦未身任其

青而不加察耳臣伏讀

明詔有曰內府各衙門供應錢糧朕加意節省用自有餘大哉

皇言有以仰見

皇上節愛之仁同乎天地而唐虞之隆可復見於今日矣顧臣等雖庸駑謬司

國計敢不奮激以對揚

休命但往事因循已成七年之病今承空乏急無三年之艾臣前所計歲入發邊在部之數已為無備而在各邊所儲猶日亦不給此臣所以不得已而為通時變之說也臣不敢避瑣瀆而再條

開措處于後蓋窮則變變則通若拘泥執滯坐視而不為先謀則臣之罪無所逃矣然此先目前之急則可以為久遠之圖則非古人有言國無三年之蓄則國非其國今臣查京通二倉存貯糧米共止七百萬餘石總以各衛官軍月支二百五十萬石計之僅足二年半之用耳而漕糧四百萬石內除撥薊鎮三十萬石又撥湖廣顯陵承天二衛官軍免減折與撥運薊州倉軍行糧昌平密雲二鎮軍餉外每年實止運京通二倉三百四十九萬二千六百五十五石四升加以拖欠漂流歲不下二十餘萬石今歲漕糧

改折十分之三又內外各衙門歲派白糧奉

詔

半若或撥支湊給則歲用之外所存無多欲為三

年之蓄亦不可得況於六年九年之求乎萬一
河道阻滯輸運不通而白糧亦阻六宮百官之
需皆取之於太倉又將何以為備耶兼以四方
虛耗百姓困窮邊餉增多原無額派掇括之計
已極善後之策何在此臣所以杞杞人之憂而
又有預遠圖之謀也臣請議處目前於先而復
詳其說於後焉蓋七年之病而求三年之艾必
自今蓄之乃為可得若但知目前而不懷永圖
則臣負

陛下委任之罪雖粉骨碎身亦無以自贖矣伏望
皇上留神俯賜垂察臣不勝幸甚邊方幸甚天下幸
甚

計開

一南京倉坐放軍士月糧隆慶元年七月例該
本色該臣先任南京戶部尚書會同右侍郎
萬士和查照總督糧儲衙門題

准隨宜折放因見本月來價頗平改放折色六萬石
每石折銀五錢共支放在庫銀三萬兩以江
西舊例本色南米一石每石連耗腳實徵八
錢民且稱便今雖會派本色已行徵收尚未

依期合行該省將坐派南京倉米本色內收折六萬石每石折徵八錢內將五錢解南京戶部庫抵還前數扣解三錢之數解太倉庫可得銀一萬八千兩以接濟邊餉

一南京工部見在庫銀一十九萬三千五百一十四兩先該部

題取十萬兩但於內新增蘆課銀一萬九千四十九兩零原係本部集官會議題

准行巡江御史清查當不止此數仍行申明嚴查盡行起解

一漕糧奉

詔改折十分之三該兌運米改折

九十萬六千六百七十九石五斗九升改兌
米改一十八萬七千九百四十壹石伍斗
一升先時災傷議折每兌運一石折銀七錢
改兌一石折銀六錢及查嘉靖二十年該御
史鄭芸題因邊餉缺之議將漕糧改折十分
之三每石折徵一兩內將輕賚蓆板并耗米
等項折銀扣解濟邊餉彼時戶部止照常議
折兌運七錢改兌六錢而原議折耗等銀通
不查處以致二十二年輒沿襲此議改折
發邊有失建議之意又查得嘉靖三十七年
尚書方純題

准每兌運一石徵銀九錢改兌一石徵銀八錢已有
前例相應查照改折徵納且臣任江西巡撫
時查知江西兌運改兌皆每石加耗四斗又
加濕潤米一斗又三六輕賚折銀一錢八分
楞木蘆蓆折銀在外大約兌運一石民間徵
銀一兩三分改兌八錢以上其河南山東雖
係一六輕賚較之三六二六若為輕少但臣
先任大理卿見外詳河南衛輝府輝縣民人
王傳招內每兌運米一石徵銀一兩伍錢以
此例各州縣亦相去不遠故河南布政司每
年督糧道到小灘買米交兌將餘銀解回

抵補 王府祿糧是每石九錢知不虧累計
此各扣折徵之數亦不背

明詔可多得銀三十一萬九千餘兩以濟急餉

一隆慶元年漕糧四百萬石奉

詔減折十分之三內除薊鎮本州倉原額三十萬石
舊例折色十四萬石本色十萬石又改撥天
津倉改兌米六萬石及

顯陵承天二衛兌運原議改折兌運三萬七千七百
三十四石七斗改兌一萬三千五百二十八
石三斗共改折米五萬一千二百六十三石
外實止歲運京通二倉兌運米三百二萬二

千二百六十五石三斗改兌米六十二萬六
千四百七十一石七斗通共米三百六十四
萬八千七百三十七石內以改折十分之三
計之該改折米一百九萬四千六百二十一
石一斗以議單每軍該運正米三十石七斗
二合計之該用軍三萬五千六百五十四名
以兌運不操減存事例該每名每月扣糧銀
二錢每年十二月每名合扣糧銀二兩四錢
通共該銀八萬五千五百六十九兩六錢以
每軍一名行糧三石每石折銀五錢計之該
給銀五萬三千四百八十壹兩但於內有

江北衛分減給米麥二石八斗二石六斗者
大約亦該行糧銀五萬餘兩案呈查先該本
部議覆巡倉監察御史蔣機題為陳末議申
漕規以裨

國計事內欸開補缺舡以濟糧運將漕糧改折應
減運軍行糧及免改米席板枋木輕管等銀
照數折追一同管解漕司以備補造缺少淺
舡題奉

欽依去後今該臣案查嘉靖四十四年十一月內該
本部會議准漕司條陳款開議補缺舡以濟
全運乞留河工銀兩補造舡隻原係輕濟銀

兩每扣耗米二升折銀一分歲得餘銀二萬兩已經題奉

欽依自嘉靖四十五年起至隆慶二年止應徵河工銀兩准留三年收貯准庫補造舡隻去後本部失於查明參酌議處以致復將改折輕賚席板行糧等銀又行盡數准解漕司補造船隻之用似涉太多其減存料價又失開議今查九邊民運以隆慶元年奉

詔歸半少銀數多乞如臣今議將輕齎席板等項總算折徵每兌運一石徵銀九錢改兌一石徵銀八錢解赴太倉庫查和接濟邊餉其減存

糧銀兩與行糧扣價約共一十二萬五千五百六十餘兩內扣三萬五千五百六十兩遵照巡倉御史原議摘解漕司湊前原議河工并嘉靖四十二四五年三年減存糧銀查追補造船隻已自有餘外共十萬兩仍通查催一同漕折銀兩解赴太倉庫接濟邊餉但在外省府諸臣一聞改折遂將應撥運糧軍糧不行取補則月糧無支而減存料銀置之傳閣且運行糧南京各衛例該水次倉支給其餘各衛所俱於本處倉分及淮徐鳳陽等處支給勢必推延仍合嚴行漕司并行各該司改

折十分之三照依上年全運撥派各該衛所
定數造冊發各省府州縣照例查覈追納徵
解庶不悞事而可期實用

一南京兩總每年例該撥運江西浙江二省糧
米各十萬石以資三六輕賞幫貼之用計江西
十萬石約該漕軍三千二百餘石各旗軍行
糧皆例於本衛造冊赴江西水次將該省額
運南京倉米內坐支每名三石約該行糧九
千六百六十餘石每石例該折銀五錢外應
扣腳耗銀三錢名曰行糧扣除共約該銀二
千八百九十八兩合應照數取解太倉庫接

濟邊餉其浙江十萬石旗軍行糧查果在有司坐派南京倉米內支給亦照行例一體查扣解部

一南京上元縣庫見貯南京都察院項下贍贖銀一萬五千六百七十三兩九分零戶部總巡郎中項下銀二千七百六十一兩九錢五分零刷卷御史項下銀二千八百三十二兩二錢一分零江寧縣庫見貯南京都察院項下贍贖銀一萬二千四百八十三兩一錢一分零戶部總巡郎中項下銀八千五百兩四錢九分零刷卷御史項下銀五千二百五十

二兩八錢六分零二縣寄庫銀共四萬七千五十三兩六錢九分零除南京都察院量存十分之一合取解二萬五千三百四十兩五錢九分其總巡刷卷項下盡數解部共該銀四萬四千二百二十八兩七分

一各省并直隸府州所屬遞運所除坐派支關夫船外尚有額稅防夫每所或三四十名或二十五名本為交接防送逃軍囚徒而設今俱各僉長解及差壯快人役管解並不用此役皆多在司道府州縣衙門供役打差相應行撫按衙門盡數查出革去將隆慶二年防

夫徭役銀兩通行解部接濟邊餉

一各省并直隸府州縣各編有民壯快手機兵等役及各巡檢司弓兵皆本以護守城池及巡地方等役近來因循習弊多不操練皆在州縣打差撥送過客及司道跟用合無行撫按衙門各照額編原數每十名查扣二名工食在官單去募役通將扣過名數及原額若干造冊一同解部以濟邊餉

一醫獸之役原為聚牧孳生馬匹而設今駉騾馬各派養寄民間自行餵養牧馬草場又聽軍民耕種另行收納租銀並無千百成群放

牧何用醫獸在官而各州縣猶照原額徭編
前後歲解太僕寺作為公用支費似出冒濫
合通行該府州縣但有額派徭編前後者俱
各查追役銀類解戶部太倉庫充補邊餉不
許解寺仍行各該撫按衙門清查永為歲用
開報

一各處攢造稅契銀該本部原行查解並無十
之一二而各處稅課司局皆徒存虛名俱係
州縣私自徵收牙行稅銀今查止順天府武
清縣歲解商稅餘四千兩張家灣鹽商牙行
五百兩其他如徐州有一千兩淮安府一千

餘兩近皆奏請 聖裁

一京師積蓄全在太倉嘉靖二十年以前在倉
糧米尚有七八年之蓄今止二年餘矣不無
可憂蓋皆緣嘉靖二十年以前因邊餉缺乏
議行改折後又累次空運邊鎮及河阻歲灾
倭警燬船各因而議折以致月漸耗少若不
自今議行積貯則七年之病而三年之艾終
不可得矣何者漕糧四百萬石內除薊州三
十萬石係原議外其三百七十萬石皆應盡
輸京通二倉計一年除二箇月折色外該歲
支二百六十七萬石猶有一百萬石存貯似

有三年之運而餘一年之積也今自嘉靖十一年以 顯陵承天二衛兌運改折又於嘉靖二十九年北虜侵犯改撥薊州班軍行糧及昌平密雲二鎮糧餉共去二十萬七千三百四十四石六斗遂習為例在昔既以改折它運而耗減在今歲收又不查復原額則後各處有水旱之災日亦不足矣是則今日之所當議復者也

一湖廣荊州安陸二衛改

顯陵承天二護衛兌運當矣而船米則宜攤派之各總衛所代運不宜改折以虧原額也以湖廣

之三萬七千七百三十四石三斗改折猶為
有說而江西之一萬三千五百二十八石三
斗偶緣是年派二衛兌運因而槩之何也是
皆原議未妥相應改正仍復本色行漕司分
派各總輸運

一 薊鎮撥漕糧充班軍行一萬二千一百四十
石斗原非舊額出於庚戌年虜警奏撥本出
一時之事因襲為例則謬甚矣夫班軍惟兩
京在外衛所分班入衛者則有之在各鎮則
惟主客二兵雖調用班軍其行糧亦令作客
兵內會計為當況該鎮二十四萬石漕糧本

色原額既以改折十四萬石又何必取此本色以虧太倉之額相應改正輸納京通二倉其缺之前額軍餉改作客兵年例內會計加發銀兩可也

一密雲鎮近撥漕糧十四萬一千八百一十石八斗昌平鎮三萬九千二百七十二石五斗俱非原額亦皆始於庚戌之警其該漕糧一十四萬四千八百三石三斗歲撥山東河南二省兌運水陸輸納官軍甚亦負累臣先任漕運都察院曾建議寄囤通倉本部委官另行轉運者只為恤在運官軍之困尚未及為

儲蓄深長之思也今照太倉歲積不前相應依舊改在京通二倉上納以足原額其昌密二鎮軍餉照數議行比照大同事例於隆慶三年為始預發銀兩於秋收之時委官抵石糴買上納昌密二倉庶可復歲收原額三百七十萬之數縱有拖欠一二十萬石每歲多此二十萬糧則漸漸充裕而三年之蓄可必矣

一臨清德州二倉原係本部題差主事監收糧米以前皆有數十萬石之蓄後因倉攢守支告難又各差去上事避嫌不肯發銀糴買漸

亦減少本部以前諸臣因見發遣銀兩不敷又
歲各取解十萬餘兩抵數以致今蓄積無多
臣思此二倉皆在運河之北相應議復原額
於隆慶三年照例積貯萬一河道有阻即此
亦便於轉運

京師則有備無患而不至於坐困矣

一積蓄之務本以虞今日倉庫多虛在在告乏
又節以水旱兵防之故在外者奏乞停徵在
內者奏乞多發每至掇括無遺別無善後良
策不知夏秋稅糧額數之入已定而今歲出
者至增數倍而難繼何能有餘若預備倉

祖宗之制甚周乃今奏行者多不究心遵守徒為虛文一遇水旱輒行

請發內帑失量入而出之規非居重馭輕之勢年復一年將來必至不能救藥矣蓋邊鎮之會計雖講而兵馬未覈出納未清無以時勢陵夷屯牧不脩大非徃日之舊而因時酌損以就中振作量劑其出入者則在今日宜亟行講求者也於在外預備倉宜申明

祖宗之舊制查議先後所因革者而詳計之戒飭有司着實查行則亦庶幾有備於外而各處或遇有水旱之災不至束手無策而皆紛紛仰

給於內帑矣

一生之者衆食之者寡為之者疾用之者舒此
生財之道萬古不易也而在今日之勢有難
言者矣昔人謂一人耕之十人聚而食之雖
欲無饑不可得也今則一人耕之不止於百
人聚而食之矣九邊之兵馬比

祖宗之舊增添數多而歲派民運錢糧止是舊額而
又加以征調客兵之費日亦不給且秋青屯
糧漸以耗減無徵欲量入為出而勢不可得
者况四方風俗民情日以奢耗而務本者少
作無益害有益者皆未之禁費出無經而官

民糜費今欲變今之俗由古之道不去冗食
節浮費不重守今課農桑務本業不得而更
化也今農官有專設營田有重委

朝廷非不留心於此也而無實意舉行之者故未
見有可績之效則廢而富富而教崇本抑末
制節謹度以量入為出者則在內外諸臣
心一體以圖報勵有為於今日而后戶部
得而不平量入之以調其盈縮也不則於
揆括計窮而教廢無術矣以上所議世所謂
慮遠圖者以此但生財積貯究極本源首內
外一體着實施行而后有濟至於冗役冗食

之費累經建議輒復停寢而邊鎮兵馬添增
數多秋青心糧減少無徵皆非

祖宗之舊清查覈實酌損革興天下稅糧原額已定
邊餉不敷從何區處通候該部院科道諸臣
議開另行題

請至於漕糧改正欲自今為之則又以奉

詔蠲免歲用不敷無銀糴發其前應復舊漕糧乞於
隆慶二年會議定擬其糴買事宜乞於隆慶
三年查照施行伏乞

聖裁

隆慶元年九月十六日奉

聖旨這所奏都准行你部裏還行與內外諸司各要
實心經理樽節以濟國用

吏科右給事中臣劉體乾謹

題為財用詘乏懇乞

聖明特賜節省以足

國裕民事臣惟近自北虜陸梁肆為不逞

陛下赫然震怒爰集義師奮欲有以大舉而撻伐之

一時國計所須往往告乏顧各該建議諸臣或

欲徵厯年之欠戶或欲加數省之賦額無非以

供億既繁調度莫繼遂為是一切不得已之計

姑以紓困急佐經費也臣愚不知生財大計但

聞之宋臣蘇軾有曰方今之計莫如豐財然所

謂豐財者非求而益之也去事之所以害財者

而已由軾之言觀之則今日之事不在於經歛之紛紛而革冗吏清冗費乃當今理財之第一義也臣不暇遠考臣嘗見原任禮部尚書霍韜之奏有曰我

朝自成化五年武職已逾八萬矣合文職計之蓋已逾十萬矣此固韜之言也猶自成化五年以前者云爾也計之於今則歷年邊功之陞授勲貴之傳請不知其幾是武職又不止於八萬矣各衙門之添設大臣之恩廕不知其幾是合文職又不止於十萬矣臣以是推之成化五年之吏視洪武初年之吏為冗今之吏視成化五年

之吏為尤冗也遠而擬之宋制止二萬四千餘員唐止一萬八千餘員漢制止七千五百餘員與唐虞之建官惟百夏商之官倍用又奚啻倍蓰不但此也他如內官閹宦之收入者漸廣未有底極錦衣衛官之

奏乞選充者漸多未有限制中書科等衙門乞

恩帶俸者漸濫未有區畫極之而禮部之譯字生鴻臚寺之通事序班光祿寺之厨役

神樂觀之樂舞生內而各監局之勇士匠人并寫字及以大工除者其間狐媚猿攀遶轍不一蠅營狗竊寔寔且多臣不能悉舉蓋已萬萬於

祖宗時矣是皆張口待哺以仰給於

陛下者也且如勇士匠人至賤者也勇士每月則有月糧一石馬料豆九斗穀草三十束匠人每月則有月糧一石直米三斗五升所費固已不貲至于一官則有輿隸廩祿之類所費又不止此也其所以糜爛其財賦者豈少少者哉臣又思之土地猶夫

祖宗之土地戶口猶夫

祖宗之戶口也賦稅猶夫

祖宗之賦稅也獨至於用度乃百倍之是其所入者少所出者多譬之富軍大家生理猶前而賓客

之資廝僕之費視前及侈則千金之產有不索
然而罄者哉此其蠹

國耗財之原所宜痛懲而亟罷之者也不此之求
乃於憔悴無聊之民而屑屑取盈焉此臣之所
未喻也臣愚伏望

陛下勅下各該衙門除見今聽征官員并在營軍士
不查外其餘內外大小衙門一應冒濫食糧及
前項人數逐一查議何人應存何人應革扣算
定擬停當備造文冊 奏繳仍乞

明詔務從簡約庶見為 國節省之意此臣之所謂
革冗吏者一也臣近又查得光祿寺卿高澄等

題稱本寺所費錢糧自嘉靖元年至十五年積
剩銀不下七八十萬自嘉靖二十年起以後本
寺供應日增歲會銀兩又多拖欠以致不足等
情臣近又查得本寺進

御果品等項原無定額臨期止憑內官小票數目交
納及果品既進小票隨即取去明日內官又復以
昨日所進者實與本寺行戶以備上納臣固知
聖明節儉之意然始如一而所以有前後多寡之異
者因內官之滲漏乾沒於其間也蓋其經制之
初禁有品度其供應之際自難以稽查以本寺
諸臣不敢問其真偽不敢辨其是非而會焚之

徒得以自便而自取矣臣不意

光祿在上憂時惜費日有孜孜而若等之嗜利行私其無所忌憚者一至於此也然此但有自光祿寺一處言之其他供應等衙門中間轉移侵盜尚有未易悉數者臣嘗讀周禮見周公於凡王之饗膳酒醬之物次舍喪服之用一一為之度數而又於歲終大宰以九式節財用蓋亦聖人防姦之微意也臣愚伏望

陛下做成周之典 勅下禮部將內外各該供應等衙門所用品物錢糧再三酌議如其衙門一日合用品物若干通計一年合用錢糧若干開具

明白 上請裁定著為令典每遇年終仍選差
科道一員逐一查盤

奏繳以防冒破如此則豐約有止數取之者不得
而妄取盈縮有定規供之者不得而妄供而糾
察會計之事又得以行於其中則沉匿掩蔽之
患自無所容而帑藏之貨賄將見其有餘矣此
臣之所謂單冗費者一也二冗既除則事之害
財者去害財者既去豐財者自至而徵欠加賦
之事可無講也說者謂臣等所見或非拯溺救
焚之策臣則謂二冗之除慮在奉行者之未得
其人耳若果當事大臣真能仰承

德音悉力奉行則所省當不下數十萬金朝焉在彼
能省數十萬金之費意焉在此即得數十萬金
之蓄見效甚速為力固易民既不擾國亦不乏
也且月計不足歲計有餘一月既有數十萬金
之蓄一歲常有數百萬金之蓄是所謂三年耕
必有一年之食九年耕必有三年之食如之何
而可不行耶況今天下府州縣百姓資產蕩析
邑里蕭條嗷嗷之情大非前日而所在官司急
於督併然箠楚不勝之際固不可謂全無欲辦
之心而死亡不瞻之餘亦難保其必有可完之
理則亦徒掛簿書刑罰而已是節用愛人之道

臣固不敢於此時謬為迂闊之談而目前辦幹之圖臣亦不敢盡以為得也即使文戶徵焉盡如諸臣之議而冗吏之聚而食之者如故侵費而盜之者如故則亦無異乎世之所謂揚湯止沸者如薪不抽沸終不止揚之何益臣固知於耗虛匱乏之患無補也且此輩皆貪饕無厭之徒倖門既開必至侵淫未已將來之吏能無愈冗於今日者乎谿壑未遂必至泛濫無極將來之費能無愈冗於今日者乎而百姓之欠者從而益欠加者難以復加雖有百劉晏者出何以為措手之地耶故臣敢謂冗吏既革冗費既清

雖不徵欠戶不加賦額貧可使富也不革冗官
不清冗費雖欠戶日徵賦額日加富可使貧也
臣愚惓惓尤望

陛下念時事之多艱憫生民之未遂節省一念斷在
必行申飭各衙門當事大臣務要著實舉行毋
得陰為庇護耽延時月曲示包容相惜顏面使
此輩當緣倖倖以圖苟免中間如有此情弊及
應革應清相干衙門人役敢有推調抗違并鼓
動浮言陰為阻壞者許臣等科道訪實叅
奏治罪仍偏諭京城內外諸司除事干緊要軍
務其餘一切不急之需併從裁減如是則

國豐而裕無功不成士飽而敵有戰則克蠢彼醜
虜情宥之則為舜格有苗不但如漢文帝不宥
則為殷之鬼方不但如唐太宗進退伸縮無不
在我業隆湯武功光

祖宗顧不足以示天下垂後世也我使失今不圖悔
將無及臣恐敵人無歲而不入則邊備無歲而
不嚴邊備無歲而不嚴則錢穀無歲而不費府
庫已竭而調度方殷根本已空而蠹耗不止如
不幸而加之二三千之災或連年之歛財已
盡而計窮敵已至而力屈殆有不能不重煩
朝廷之憂者矣是豈容臣等悠悠拱默坐視之時

平臣是以不辭固陋條例

上陳伏惟

陛下憐其迫切不容已之情赦其冒昧無所知之罪
留神採納俯賜施行天下幸甚臣愚幸甚

嘉靖三十年二月初八日奉

聖旨該部知道

陝西道監察御史臣黎貴謹

題為重 國計以保盛治事臣聞古者三年耕必
有一年之蓄九年耕必有三年之蓄無三年之
蓄者曰國非國也以臣觀今日京師困竭已不
不可言而各省三邊亦皆動以窮告一有盜賊
水旱師旅之興輒東那西補或借發

內帑或橫歛民財猶不足之文梓如此一年且不足矣
安望其有三年之蓄乎此天下治亂所繫

國家命脉所關蓋不輕而重也臣請借小以喻大
今有中人之家歲收百畝之入以供公家之賦
下以為父母妻子之養善為家者必先預計入

之豐約以權其一家之支費蚤夜思之吾家歲
入幾何為費幾何其合營辦者何業合裨補者
何缺然後取之無窮用之不竭不善治家者反
是矣今朝廷制天下之用未必如人之慮家
而又承正德靡費之後安得不困竭乎臣姑舉
一二言之如國初所賦夏稅麥四百七十一
萬二千九百石今所賦四百六十二萬五千八
百四十三石國初所賦沙糧米二千四百七
十三萬四千石今所賦二千二百二十萬二千
三百七十四石而宗室之蕃官吏之冗內官
之衆軍士之增及凡百支費視

國初不知幾倍徒美以賦入則日損以支費則日加雖巧者莫知為策矣不知

陛下當如何而慮也臣愚願

勅下該部使詳考 祖宗初天下賦入若干

上用若干 宗室若干官吏若干內臣若干軍士若

干及凡百支費若干所餘若干正德年賦入若

干 上用若干 宗室若干官吏若干內臣若

干及凡百支費若干所餘若干有無與今日賦入

之數仔細斟酌何者當益何者當損逐一一定為

經制以十分為率幾分供 上用幾分供

宗室幾分供官吏幾分供內臣幾分供軍幾分供

不時之費又餘幾分備盜水旱師旅之用幾分
備遞年拖欠或特行蠲免之數將來

宗室日蕃祿食如何而周官吏內臣軍士日增用
度如何而給倘有警急如何而可以轉移相濟
如何可以裨補無缺一區畫

上請特加裁定永為遵守以後逐年將內外之費用
及見在或有餘或不足之數總為稽筭半年一

次奏一聞則

陛下自知賦入有限而費用不容於不節矣然其數
散在天下逐時收支增減不一未易以考也必
如成化年間事例令各司府所屬一應係官錢

糧每半年一次查算分別舊管新收開除實在
造冊仍要見實在庫銀若干何項應解京何項
應存留支用倉糧若干每月官吏軍士等項該
放若干約量可足幾時支費此外尚該若干有
餘可備緊急如有不敷亦明白開報上半年限
七月下半年限次年正月順差舖馬人役照地
遠近定限送部查考所司敢有不依限次造報
及所報之數不實將經該官又行巡按御史提
問如此則所賦與所費之數如指諸掌矣雖然
臣所言者節財之流耳所以害財之源則復有
說焉大率由拖欠侵欺之弊壞之臣嘗差福建

刷卷查盤稽考各處拖欠侵欺之數以一縣周歲計之大率四分甚者五六分一縣如此天下可知其弊又由近年為令者已完糧未完糧皆未考滿皆得轉遷是以人無勸懲因循苟簡自謂三年一陞例可立待一應錢糧無復查理致使小民拖欠侵欺百弊並集及上司督責一時拮据逮繫死亡相繼非徒上損

國用抑亦下傷民心臣又願

陛下特勅該部再為議擬除以前

詔旨應該宥免者盡數與免以後嘉靖二十年為始查照節年題 准追徵事例通行嚴加申諭守

令務將一應錢糧依期追徵仍令考滿之年申
請布政司查理任內錢糧果完方與轉呈撫按
覈實給由及起送吏部之日再行戶部查單相
同方准復職如未完及捏報者吏部查出即行
降罰雖有他美亦不准陞扶同保送官仍一體
問罪如此則守令之官皆知安於久任注意錢
糧拖欠侵欺之弊可絕期以十年日增月益而
財不可勝用矣

嘉靖二年

聖旨該部看了來說

吏科都給事中鄭大經等謹

題為酌議任官事宜以少裨

國計事宋臣司馬光嘗謂天地生財止有此數不在官則在民言不能兩利俱存也方今

國儲內置官帑之搜括無遺民病誅求海內之虛空日甚既不在官又不在民矣母乃屯政不脩而財源日塞邊儲加益而覈實未嚴以故歛之甚勤取之盡法而時艱無濟也屯田之法專官而經理之矣查覈之令詳議而布告之矣所以開財源節財流者亦既講求脩舉孜孜不暇逸矣第善政脩復于廢墜之餘奚濟燃眉之急切

實稽檢于尺籍之著難窮影射之奸近聞戶部
題每年正額缺至一百五十餘萬此皆張口時
哺不容一毫虧欠不容一時稽緩者也夫以

國家全勝之天下四海雖多放尚稱又安財用缺
乏至此萬一不逞之變突出不虞潢池之警忽
生意外財用所需為第一急務者何以應支且
直諉于難為而遂已之乎及是時正宜悉心區
畫通融酌處若恬然不恤坐以待之無異燕雀
晏然于堂室之安者其害可勝言哉臣等待罪
該科任人事宜職得與聞敢據臆見用備采擇
少資國計諸凡職掌所關者俾令各盡其見

蓋時務所急莫先于此而芻蕘畢集庶或有裨于時艱之萬一也

一曰重推務我國家通商裕國凡財貨舟楫會同之所置關權稅部臣專

勅往督之蓋取商賈之纖微以資

國用重本抑末之意亦行乎其間年來當事之臣固有潔已澄源通商利國者然操柄行私義法干紀者亦徃徃有之夫關市之設取之民者已無遺利乃不盡利于

國顧充嗜利者之囊橐舛亦甚矣近年題

准輪差府佐一員監收防範亦云密矣但委官通判

部臣不肖者少假體貌既甘心以聽而不復計其說况錢糧掌於部臣委官不與名雖監收實無稽檢近日九江鈔關主事楊柟稍不降節通判郭希泰刼制之因得所侵匿不下數萬在他關務尤可類推夫當

國用匱乏之時顧以自然之利不充公家之費而以資墨夫之貪良可痛恨茲欲益行加額必至橫征而無藝欲折衷定數尤恐膠柱而難通其要在於得人而已故必擇部臣清望有聲者不必拘于主事不必限于一司而部之日聽堂官考察一如御史出差回道之例果操持堅定賦

倍往時者各送吏部陞授憲職京堂官以示風
勸各府委官輪差推官一員每季更易循序遞
差不許推諉在部臣止據所報定稅商人執票
赴委官上納稅銀寄頓府庫積至一季通查傾
銷該府掌印官年終類解既不得增添以浮于
數亦不得減省以要于民彼此互稽雖無定額
而有定數至于相見儀節約為定例以便遵守
庶賢者得以自白其心不肖者亦以有制而不
敢放肆矣各該地方抽分小稅所在巡按通查
附報各差部臣一併類解敢有仍前乾沒者聽
巡按糾治以懲不恪蓋與其括索無告之窮民

不若因自然之利加處治之法着實舉行未必
無資于國計也伏乞

勅下戶工二部查議通行通因考察各差部臣諸涉
瑕疵者斥調降謫不少貸既足示警矣工部主
事楊時喬操持潔白後先莫並所上權利事一
書且占素養若不稍加優處無以倡率將來伏
乞勅下吏部將楊時喬別改清職以示表異
部臣不職者四部考察即行處分不俟大計以
定去留如此則勸懲不惑而人心競勸矣權務
之不可不重者一也

二曰革冗員我國家因事建官宜無濫職可

裁矣但各衙門事務稍簡而員額浸多因事增
置而添註如故匪直廩祿之虛糜事體亦未為
妥順也內外各衙門咸有可議者年來錢糧詘
乏屢行裁革報到裁減官員率多雜職儒官所
省幾何徒滋繁擾在京各衙門各俸薪皆出州
縣徵解以充減一員省一員之供應大者姑未
論即如兵馬指揮一員約計俸薪五十餘兩每
月額設弓兵七名或八名約計工食銀五十餘
兩每城革去三員可省銀一千五百餘兩即此
推之凡京堂部屬監局衙門事務簡而員額多
者通行查議南京各衙門事務簡而官全設者乞

轉行南京吏部將各衙門重其裁減酌
員下俸薪勒限停征庶寬一分之惠近有在外
革去訓導揭稱所革俸資無從稽考夫省官本
以省費而漫無究竟如此合無通行查革已征
在官者作正支銷不得仍前埋沒兩京衙門裁
革官員及裁省俸薪

勅下該部一併查銷庶官有定員食無冗費而于

國計未必無少裨益矣冗員之不可不革者二也

三曰併差遣夫奉

天子命以有事地方凡以按厯觀風拯民疾苦職任
不同要在為民則一事有定員事不可更置也

邇來縉節侈于儀文生民疲于奔命奉使轍跡
聯絡道路迎送之擾供億之繁當事者雖日勤
裁省而

制使大吏絕一舉動體貌自別勢固有不得不然者比
年歲不告登民力稱竭若不及時通變非所以
廣德意而適時宜也姑以直隸言之臣曾任順
德府推官每見巡按苦于無事可為而各差巡
歷者一周隨間事務畢集夫直隸僅八郡耳實
不逮一大省巡按者二而各差胥得按歷之臣
愚以巡按可以兼八郡而兩防閔武巡關二差
乃其專職巡按可無與已至于各差事務可兼

者通行酌議稍加裁省南直隸及各省兵備屯田水利等差可議併者一體裁酌至于先經有事地方添設兵備事寧之日相沿之日尤屬贅員至於各府通判多至二員三員者通行酌議可革者革可省者省不惟供費之節縮足以紓民之力而繁文既除亦可免多事之禁錯矣至于禁止迎送之際尤宜一併申飭庶官省而民力可甦事省而官屬無擾矣均乞

勅下部院從長計議以紓

國計差遣之不可不併者三也

四曰催勘報夫懲貪之禁不嚴則民生奚賴查

勘之報不結則文具徒施通因貪黷日熾凡撫按糾劾有司擇其甚者欽奉

明旨提問追贓以禁貪黷以衛民生法禁亦嚴矣完銷者十無一二玩忽故縱沿習故事者相望焉殊非所以重法紀而昭官戒也伏乞

勅下都察院通行查檢近年行移提問勘合完過若干未完若干監追贓銀完過幾分未完若干逐一查明行各該巡按衙門嚴限完報及遵照近日題覈輸邊事例速行歸結則法令之布既足以昭大信于天下而剋剝于民者亦可取之以償于民也差內追完贓銀揭報該院以憑稽考

間有事由誣捏罪非自致顯有的據者亦須明白開豁奉

旨定奪毋重相徇之私而忘大公之義均乞一併通行庶事有歸結而法無枉縱勘報之不可不催者四也

五曰酌開納夫治經事貴通變酌而行之惟其宜焉耳方今財用匱乏是歲計不足之數毫釐不可缺者及今若不措處而倉卒為計惟有加賦一節為足以救目前之急竊恐邦本所在關係匪輕年來兵餉之加倍于常賦而水災旱寇無處無之小民亦嗷嗷待賑于上矣若剝肉充

腸氣息雖存而大命隨之其何能及哉近因
帑藏空虛專官括索毫髮靡遺而州郡所積盡行
徵解無復有存焉者矣夫名器不可假人而鬻
爵非盛世事少知治體者孰不知之臣愚以天
下事執一者難以達化通變者所以趨時方今
民生困竭與其括待盡之民以傷
國脉孰若取有餘之民以紓

國計者之為得也我國家任官之法極為詳悉
始焉官不輕授而考選之必慎有司小吏少有
不職監司者隨以法繩之未嘗假借以恣縱其
不肖而黜逐譴責未始姑待于三年之後也夫

親民之官不得而輕授矣開曹散局似亦可行也品秩之崇不得而濫加矣空名虛銜似亦可與也伏乞 勅下該部通行查酌可無碍于選法者量行開納要亦時詘而通行之以權取之于民而無損于民者也此開納之所當議者五也凡此五者事非常經裁之可以善治時當變易措之足以宜民要之寬一分則民受一分之賜省一事則 國受一事之福其于

國計未必無涓埃之助也伏乞

勅下部院一併酌議見之施行臣等不勝願望至于根本所在日望我

皇上崇儉德以先天下諸凡上供錢糧足支一二年者勅下該部查照嘉靖年間事例量行折色或三年停止或間年一行一通融之間而匱乏以濟民困可紓矣至于服飾器用尤宜節儉以昭令德方今天下名雖治平而財匱乏實有莫測之憂宵衣旰食此其時也尤望我皇上亟加之意臣等不勝懇祈之至

隆慶

聖旨該部看了來說

戶科都給事中臣李邦義謹

題為仰體

聖心敷陳愚見以圖足國裕民事臣等切惟食貨者
王政之所先積貯者天下之大故周官嚴九式
之條而王制重九年之積蓋以量入為出酌盈
濟虛誠有天下者之不可以一日不講也近蒙
皇上軫念積儲匱乏特

諭計部以處理充蓄之計仰見

聖明憂國憂民之盛心凡有見聞實思所以贊

廟謨於萬一况臣等待罪該科與聞

國計者乎但錢糧之數目浩繁出入之頭緒紛沓

有未易以旦夕曉者昨見該部條列八事以上
亦可謂幾於詳盡矣然臣等竊疑之見再四訪
求猶有一二可以引而伸之者敢甘隱默不併
為我

皇上陳之臣等切惟理財之道莫過于大學一書至
謂生財之道則不過曰生之者衆食之者寡為
之者疾用之者舒而已而唐臣陸贄亦曰生財
之豐歉在天用財之多寡在人節之雖虛必盈
不節雖盈必竭合而觀之則開其源與節其流
理財者舍是無別法矣方今山林川澤悉入
徵輸夏稅秋糧各有歲額舳舻千里飛輿輻輳

其所以充邊儲而供

國用者既有成規矣頻年以來倭虜為患此外復有坐派之名養馬養兵之費而當事臣工權宜議處至於贓罰商脫寺產事例度牒引錢所以搜括之者亦既無不盡矣況今閩廣鋒鏑之餘殘傷未起淮徐荒歉之後逋逃未歸而江之在山之東亦且以水溢旱乾紛紛具奏則聚財之法誠不可以一毫復加于民者矣然則處理充蓄之計舍樽節其何以哉昔人論節財之法有謂在于革冗貪汰冗兵節冗費今之冗員誠不知其幾也嘉靖四十年為帑藏匱乏歲用益煩

該本科建白已經議革之矣然所革者不過務
司壩驛之流以上曾未有一議及之者其為省
能幾何哉茲且不暇遠舉即有錦衣衛恩廕之
輩踵接肩摩各衙門帶街之官日增月盛是雖
賞勞酌功之典所不容無而冒濫之費則不可
不為之慮矣一澄而汰之或禁止之於後則所
省不既多乎民出食以養兵兵出力以衛民此
定例也况京師之衆皆取足於漕糧又率數石
而致一石其徵解搬運之苦不論也奔何其事
以易視之查得戶部所開月糧之數共該支米
二十四萬五千餘石及查營操總數則至于九

萬焉其餘或係錦衣衛官校人等或係各衛所
官吏勇士官攢人等或係各該匠役人等湊之
乃合前數臣等訪得此項月糧弊孔甚多有以
一人而每月包領數石者有以一吏而每月冒
支數石者考求其故則以兵馬之實數司農不
得而知也錢糧之出數司馬不得而考也各司
止據衛所開來之數即以付之糧廳糧廳止憑
各司所發之即以准其支給漫無稽考如此則
以無為有以述作在之弊亦將何所不至哉夫
以每月二十四萬餘之錢糧止養九萬營操有
用之軍士而其不操之軍士無益之衆反從而

兩倍之若是其謂一一皆充實用則臣等所不敢信矣伏乞

勅下兵部候各衙門遵奉

前旨將各項冒濫人役查革外仍要查核在京各該倉糧人數某項若干某項若干造為食糧總冊用印鈐蓋一送戶部一送本科查考如遇支放之時各該衛所造冊送司十三司領要數齊核實然後發之糧廳撥支其各該衛所官吏凡遇月終通將支過扣選之數齊赴本所註銷如或參差不齊虛應故事者聽臣等該科叅究則冒濫者庶有所懲矣至于錢糧冗費近年言官已

言之屢矣而卒未收節省之效者其故有二握
韜鈴者或邊事未甚諳一遇警報輒自周章至
虛實未探而調遣先發者矣有威望頗輕則叅
遊等官各自主議有先發後聞而不可制者矣
若此則邊餉焉得而不費哉不知按伏者兵家
之妙策何嘗責其不調遣謹調遣無非以節行
糧之妄費而已然均一調遣也行糧之支聞在
薊鎮則有百里外全支五十里外半支之例而
宣大等鎮則未之議焉或者非畫一之法歟邇
來宣大之費視他鎮為多未必不由此矣伏乞
勅下該部再加嚴行申飭各邊鎮巡等官今後須要

明白哨探詳慎調遣其有不遵約束將領聽其
脂名參究其各邊鎮行粮應否照例查議則錢
粮不患其不節縮矣夫錢粮固貴於節縮而尤
貴於措處查得

舊制太倉解發之銀止以供客兵之用而主兵則取
足於民運與夫各鎮屯粮秋青馬草等項湊給
耳邇來各邊多事以屯地馬草則稱拋荒棄置
久矣一遇缺乏即行

奏討太倉如之何不告匱也近聞有能措處者將
無碍草場給軍採打即役其力以修邊牆而人
不為怨者使人人效此則各鎮之中豈無一二

可以措處以少省太倉之萬一哉乞

勅該部再加查議移文各邊巡撫示以

國儲匱乏凡有地方可以措處如屯種馬草之類不拘多寡儘力區處或於各年民運拖欠之中設法督追完解以充下半年正項之用年終各將措處過錢糧若干督完過拖欠若干以上年為額今年省出太倉銀若干造冊

奏報其區處督造數目過多者或

特加廕秩或從重獎賞則激勸之餘孰無公家之念誰無共濟之心雖不敢大望其贏餘亦可省千百于千萬矣凡此皆臣等管窺之見瑣屑之談

無非欲省一分則裕一分之意至於轉移運用之大則惟在於

聖明留意焉耳再照

國計湏相事宜手足腹心元係一體則視之誠不容有二焉者近有淮徐等處水旱為災十室九空逃移過半其糧運之額俱累見在人戶包陪官軍師生俸糧已稱數年不給其艱難之狀悉具撫按疏中亦臣邦義夏間差回所目擊者今欲奏留商稅與改折二事誠知其萬非得已而該部靳弗全與豈非以

國儲為重恐開奏改之門雖知其急未暇理與然

臣等切伏思之淮徐之地糧運之襟喉非他處可比其荒歉又為數年之積患亦非他處可得而同也失今不處誠恐枵腹之久或有脫巾之呼其於糧運關係不小是不可不為之慮也况聞商稅數十年來原係彼中借支之數即全以與之亦不過歸其故物已耳運糧必不可折亦當權其受災輕重量准二三年仍行漕運衙門嚴督折銀完解以充軍士月糧正數則公私兩便而敷數望救之衆亦且幸寬舒於目前矣至於招撫營田一節事本堪行然非得人以任之義有能濟者臣等訪得漕運巡撫王廷素號清

修亦稱簡靜但處理通變之才原非所長當茲多事之時兼此重大之任豈可以因循坐視者伏乞

勅下該部查訪如果臣等所言非謬將王廷改之別用另推幹濟有才望者代之至於所屬府州縣官亦須另行撫按體訪精力才幹者調用庶地方得人而招採有道輯寧可望而運道無虞矣嘉靖四十三年十月二十三日奉

聖旨戶部看了來說

南京刑科給事中臣駱問禮謹

奏為懇乞

聖明定經制以裕財用事臣惟今日之所缺者非財
用乎憂其缺則思致其盈

陛下之所以朝夕軫念而大小臣工所以仰承
德意者非節用乎然九重之尊

萬機之繁四海九州之大非指揮可見即

陛下欲刻意崇儉群臣欲勵行狗國將自何處始今
上下大小之用習為故常即一事少缺人且歎
歎不曰廢置則曰固陋不曰天下之大何必惜
此小費則曰一人之見欲以亂此大經不惟拘

常者不知變通之計而當事者亦無以自解於
衆人之口衷益失宜措置乖度從而反費者有
矣蓋自古帝王之治有一定之經制布在方策
班班可考人惟不察故茫然莫措手足然舉而
言之則人又將笑且誚緣其言本五尺童子所
共知者而臣率爾言之以爲獨得之見豈不迂
腐然自古帝王經制之猷節儉之實卒莫有此
出者又安能別求其說是以不避譏誚爲

陛下誦之王制曰三年耕必有一年之食九年耕必
有三年之食以三十年之通制國用量入以爲
出嗚呼數年之外莫可加矣大學所謂財則恒

是者即此而已宋臣蘇軾所謂萬世之計者亦此而已今誠急舉其議

勅下戶部統計天下一歲常賦之入若干析為四分存留其一以三分待國用又計一歲所常用若干如其處以其事用若干其事以某人用若干開立前件彙為書冊分布大小臣工使各出所見某項可去某項可減詳議所以陸續

奏送然後會議畫一某項果可去某項果可減某項雖不省然比之某項猶在可已不拘於故常不牽於衆論去冗剔蠹必就其三分之數而後用而

陛下亦愈自節抑以下為蒼生上為宗廟中為

社稷苟可省者不以崇高自憚則經制之要節儉之

實同符帝王兼舉經傳所謂七年之病求三年

之艾者庶其在此何者蓋統天下財用之數合

天下衆人之見使同酌其所當然同識其所以

然而後適於儉則不惟當事者確有成筭不至

倒施而居常習故者亦知言不得已之意可無

他議得壽永久況天地生一世之財自足一世

之用今取民之法無所不周不必更制其入誠

制其出決無不足於用之理唯今舉動率非

祖宗之舊而於帝王量入為出贏一用三之意漫不

加省故陵夷至此誠宜操切振勵而亟返其道
則真始也雖若固陋急道不足展舒而久之漸
安迨其後則豐亨裕大之勢將有不可勝喻者
孔子曰有國家者不患寡而患不均蓋均無貧
智哉斯言誠以孔子之意行古家宰之法成王
周公復生莫之或加矣然方今國計急若燃眉
而臣且為此書生迂闊之談非不自知顧帝王
經久節用之實莫能出此出於此則泄泄於始
敷敷於終無名之征刻剝之實苟可取辦一時
者百出不顧以驅民於水火反裹脅新同歸於
敝而國將不可為矣今

國家苟且之計不可謂不用矣以穀濟之堂為錢
貨之地其始也不待其識者皆患之而今則有
識者亦視為當然矣市井無賴朝得十金夕可
舞文官府紈袴蠢穉目不識一丁是不履京師
而義然冠服且有官守之責名器之濫漸不可
長矣分遣臺臣括天下之遺聚之京師而不知
各郡縣先已坐置此等不惟蠹政於今書之史
策且將為後日笑顧猶可泄泄不為之所而欲
以苟且不終日之計圖其目前哉臣故不避譏
誚為

下言之抑古者家宰制國用必於歲之杪五穀

入蓋歲有豐凶則入有多寡禮之大倫必與之
上下故曰凶年殺禮誠不得已也今也歲無大
下一切均禮

蠲免之詔既不得不下則其不足之數於何取盈此
財之所以愈匱也誠定為經制以常賦之三分
待用矣仍於每歲之終計其所入少加盈縮如
遇常賦不登則又當加損要不過其用三之數
蓋量入以為出而必不可量出以為入也魯君
問年饑用不足如之何有若曰盍徹乎自今言
之可謂無策矣然帝王經久為國為民之良圖
卒莫能外此臣故不避譏誚為

陛下終言之如蒙乞

勅該部議擬施行則其盈縮斟酌之間尚當冒昧一
二如曰書生之談必不可行也則亦當更求其
說如上下相顧坐嘆而已則日甚一日恐更有
不可為者臣不勝惓惓懇望之至

隆慶三年四月十一日奉

聖旨戶部知道

戶科都給事中臣張漢卿等謹

題為節內費以重大計事近該

內承運庫署庫事司禮監太監梁棟等題稱急缺金銀寶石珍珠乞要區處應用該戶部覆題梁棟等具奏成造却混稱例賞及舉已往費用聳動聖聰冀圖多借查得太倉銀兩未及往年十一已支過數計無所出等因奉

聖旨這合用錢糧你部裏還上緊通融計處進用毋致缺少欽此又先該

內府供用庫署庫事

御馬監太監梁棟等題稱會計年例錢糧要將減去

三分之數暫於京庫粳米撥補該戶部題覆近
查內官內使人等實在食糧之數計支米石歲
額有餘若於太倉撥給是踵先弊欲將該庫見
在并解到錢糧通融支用等因題奉

聖旨這該庫糧米嘉靖元年減免三分之數暫准於
太倉給以後年分照舊欽此又該戶部覆奏乞
將該庫以後年分白糧務開倉糧的數坐派節
奏

聖旨糧米還照前旨徵派欽此臣等待罪諫垣職司
封駁竊見未便理難緘默夫人君宰天下繫
出入以理經費墜循巨室治生必較收入多

以為致用羸縮苟有不足必先樽節若復浪費
鮮不困踣仰惟

皇上登極實承彫弊之餘天下一歲之供不足一歲
之用內比郡邑外達邊陲罔不匱竭加以連歲
災傷生民疾苦若此

朝廷百凡度支賞予成造一一檢量多寡存舊裕
新徒欲傾耗府庫誅求小民以恣無窮之用恐
非為國家經常久遠之圖也伊尹曰慎乃儉
德惟懷永圖自古忠臣愛君率皆相用為戒臣
等頃見天象謫見地理震驚災沴頻仍財力殫
屈每有上言輒望

皇上躬行節儉以圖富庶之效伏覩

綸音有曰躬行節儉朕自有處置又曰躬行節儉已

知道了仰窺

聖慈惜福節用無不拳拳特以職掌人員先意伺隙
肇啓侈端乃至誤蒙

聽納督責取盈臣等固知非

陛下意也且梁棟等以成造急缺錢糧奏行

進用是欲括戶部之銀也梁棟等以元年粳米減

免 奏行撥補是欲耗太倉之粟也夫

府庫之財孰非

陛下之財亦孰非供

陛下之用但戶部太倉軍國重計京師百萬生靈
四方非時災沴各邊緊急調度一切干係儻至
缺乏何由支持竊度棟等之心不過緣以職掌
迎合上意以取寵悅多積歲餘以資浪費豈
知撙節計量為國家愛惜財用乎臣等見得
內承運庫自

先帝升遐之後凡豹房各處積年收貯并抄沒犯人
銀兩俱各運貯其中雖會奉有

詔旨運送數百萬於太倉銀庫收貯竟斬不采臣等
外間未知的數度其所積不為不多雖比年關
領成造鋪宮賞賜等項節有動支該部又經

供進三十六萬今未三年即已告乏支費之繁反過先朝夫以

先帝十五六年之積蓄不足今日三四年之供用若不痛加裁省雖罄天下之力恐不足以資將來之費也又查得

內府供應庫弘治年間會計歲用粳米止四萬六千石正德年來

內府人員冗濫會至八萬五千餘石既經奉

詔查選減革又節奉

欽依事內一千員名原額糧米着照數減派必其食糧人數比前漸少額供米石自當有贏餘雖減

免三分計亦不至多次若能稍益積餘足可接濟支費今又准令太倉撥補已為重冒若復以後照舊徵派歲餘之數民何以堪大凡

內府運納錢糧小民十倍艱辛坐費無藝良可矜惜經國制用豈應若此夫

內庫不足取之該部該部不足取之郡縣小民小民不足將誰告耶即今東南財賦之鄉

國家倚為盈裕疾厲橫作饑饉荐臻骨肉相食既已一面賑濟又復一面括索臣等竊為不可也傳曰天地生財止有此數不在民則在官今公私俱竭既非在官又不在民徒以靡費珍巧之

具侵漁冗濫之手不可不深察而熟計也該部
剴切論奏豈固為吝借以違

上命哉 國家大計不可不深長慮耳伏望

皇上憫時愛物去奢從儉自 乘輿

御服以及 宮掖悉從節省一應寶石珍珠無益實
用悉行裁禁一切 賜予不必濫及其梁棟等
奏稱 尊上 徽號例賞內外官員銀兩動以
萬計見今倉庫缺乏地方災傷內外

恩賜通行停罷不必過費以益匱竭其

內承運庫見存之數務在樽節用度候至豐熟漸
次供進其 內府供用庫白熟粳米減免之數

仍查先年歲例全派及節年徵補拖欠之數通融支用歲計有餘以續不足太倉撥補暫免搬運以守舊規仍遇會計年例務要開具食糧的數酌量派徵再乞將各庫前項經管官員

勅下司禮監通行查勘果於錢糧混舉增加道非啓費即為罷退別選廉慎老成之人更代掌管若祇緣供應過求附益亦乞

天語叮加戒飭令其協心搏節無恣妄費以遺罪譴如此則

國計得制用之宜民生免逃亡之苦治安大計莫重於茲矣臣等冒昧

上言不勝隕越顙望之至

嘉靖三年四月二十一日奉

聖旨知道了

雲南道監察御史臣詹仰庇謹

題為財用十分缺乏乞

賜清查欺冒以裨國計事臣惟理財者經

國之要務節用者為治之大端財不理則綜覈無法而無以開財之源用不節則侈靡無度而無以止財之流皆非求安圖治之術也今天下財用日竭而在倉庫空虛當事諸臣無計措處議下群工各陳所見以為經理之宜臣猥蒙任使職居言官恨無濟時之策惟懷竊祿之慙每于奉命巡視監局庫藏不敢不悉心盡職以負報稱謹以得于所見有裨財用者于

皇上陳之臣于本年四月內查得內監錢糧浩大租稅甚多其收納關支漫無稽考委行大使李可華查報去後隨據本司將本監收各庫廠作年例買辦關領物料總數造報到臣仍批行再查房租地租年計所入若干從何支用一併查明回報聞隨據內官監揭租

先帝時凡遇傳報緊急細巧

御覽器物雇覓各匠攢修及時買辦進貢南方茉莉香蘭草松桂等花木俱是

御前請出銀兩本監量為增添自隆慶元年以來御前項傳造器物愈見精美而四時進貢花草

果品之類俱是本監委曲辦處止靠屬廠步湏
聊以濟急所以不敢言者別無他意蓋為節奉
傳造不係外傳此內監所切于忌諱者也如謂
地租者房租者或以楊村寶坻二處為言蓋二
處地方乃係河下稍低一畝泊所在原非版籍
民田案查成化弘治年間御馬監春夏收牧馬
匹本監題准採行蘆葦蓋

皇木之用每遇年豐收成之後量取些湏以為盤運
蘆葦之費或云山西廠臺基廠等畔租者案查
先朝將本監在監年老內官不能供事者出居外廠
空閑餘地自行耕種以為優老之需日積月滋

漸為園圃本監量收地租輸之公堂以備脩飭
廠房之用如謂房租者案查隆慶元年九月內
該細瓦廠官呈稱本廠道衢高峻四面穢水灌
注呈乞及時修理該先任太監李芳建議各官
協力修築添造圍房每月量取房資以供傳造
之急又云如去歲成造圓鰲山添顧匠役買辦
物料所費不貲不敢明載如修理後苑藥欄欽
安殿觀花殿清望閣玉芳軒等亭慈寧宮花園
乾清宮擺設各樣南花松竹樹株及四時供進
時鮮蔬菜果品并修理南城河東金海亭軒龍
鳳船隻鞦韆架等項及傳造寶雕渾貼金雲盤

櫃龍箱擎臺香几等件及成造白玉石等盆俱
係本監委曲措處而于戶工二部並無干預也
等因到臣又據大使李可華申稱內開親詣該
監清查再三不肯開報但查得細瓦廠東西樓
房共一百七間南北平房共三百九間廠內房
七十餘間房租多寡不等每月計約銀一百五
十餘兩歲計一千八百餘兩灰廠一處內外三
小廠每月共租銀五十四兩糞廠每歲租銀五
十兩此特舉其可查之一二耳至于在外楊村
寶坻等處抽分清河猪房土城獐獐房馬鞍山
大石窩周口慈家屋琉璃局大石廠小石廠藍

殿廠

卷五十五

五十五

皇木廠共十四處則有地畝子粒抽分銀兩在京神
木廠山西殿鑄鍾殿臺基殿淨車殿稻田殿揪
棍土廠通廟宅隆福寺瑠璃密黑窯北果園洗
花房河西花園柳花園土城花園外而漆作蜂
窩東給殿共二十一處俱有房租地租月報內
備用殿金殿殿外水窖廣通寺張越房西安門
北小石廠海眼芦溝橋狼岱地亦有銀兩監
該管房地廣闊錢糧甚大各處租數目難以細
查前項地方猶報不盡節年徵收租銀不盡隱
匿不行開報及查先蒙

欽差巡視庫藏給事中龍光御史楊相題准自隆慶
三年正月為始聽本科道逐將該監庫廠積貯
合千錢糧照依供應庫查刷事例務求明確數
目戶工二部辦用商解一應大小錢糧俱要會
同科道監收如有數目不明隱漏參差等項從
重察治及令帶管大使逐項登記出入之數本
監往來文移不行科道掛號私自收受少有隱
漏參差許本官具由申奪在卷等因到臣看得
該監供應御用器物費雖浩繁照各部關領工
部辦納且有年例定額而成造匠作又不係雇
工覓資則供應有賴可免貽累之難據查隆慶

二年本監開派工部物料照依嘉靖七年事例
尚該銀一萬四十餘兩及太監李芳酌議裁減
止用九千餘兩在正派之中尚可裁省則其無
待前項房廠稅租以為附益之需從可知也且
細瓦廠店房係內木廠石廠在官匠作悉皆官
錢楊村寶坻等處抽稅神木山西等廠地租原
皆官地其間曾經題

准者本監遂緣此侵漁以為民害夫何以

朝廷之土地視為已有濫取租稅充入私囊惧言
官聲言其冒欺之罪動輒委諸供進支用則是
利歸已而以過歸諸

朝廷也如果賴此租稅以補

內府不足之用則皆為公費也亦宜報之于官明白支銷孰得而議之何必隱匿不行聞報而顧忌科道之稽查哉伏乞

勅下戶工二部會同司禮監巡視科道將前項房廠在京者行五城兵馬司在外者行順天府隨據查勘要見租稅若干仍拘本監弘文等科書手吳求儒等質實報年收租稅作何支用及未盡報者逐一清查應革者議革毋滋奢以蠹國病民應留者議留悉取在內庫公需應存多寡以濟本監幫補之用者造報循環文冊存查仍

令巡視科道掛號監收中間如有隱漏容科道
官查出叅奏及照揪棍一廠逼近西山該監假
籍混占民業查得先年曾經撫按等官取隨卿
等稔知民病代為申奏已經該部覆奉

欽依查勘太監李芳捏詞妄竇仍舊侵奪取煤射利
各廠之中惟此一廠為甚誠妬國害民之尤者
也仍乞 勅該部節查題奏文卷及行勘事例
嚴速催報或以本廠原額存留其餘混占小民
山地盡數給還庶國計少紓民困少息矣再照
人若之奢侈四方係之安危

朝廷之耆好左右視之趨向甚矣不可不慎也臣

切觀該監開稱成造圓鰲山修理宮苑花欄龍
鳳船鞦韆架傳造金樹櫃白玉盆之類悉皆浮
費冗用誠如該監所謂未及外傳者也吊取戶
部銀兩在廷諸臣所謂充之內帑以備緩急今
果如該監所云則是以有限之財供無益之費
臣不知其何取也蓋

朝廷費出于無經則小人覬覦以為利用無一二
而浸濫則十分之七八分矣如成造圓鰲山物
料取諸各庫匠作役之在官其費無經其工可
稽而遂報萬餘金即今一事之冒濫若此他可
知矣況當中外詘乏之時果能身親郎儉俾內

監諸臣凜然畏法奉公不敢效尤欺冒則

內帑用乏何事取盈于邊輸而司國者何至為賣
官鬻爵之謀哉臣目擊時艱乃敢因事效忠少
冀有裨 國用之萬一耳伏望

皇上念邊餉措處之艱嚴群小靡濫之費服食器用
惟以節儉為主如金櫃玉並刻絲之類皆無益
之冗費也悉亟停止近侍之臣或以織造採辦
玩好逢迎

陛下者是即奸貪小人之徒也則屏斥而深罪之如
此則正直者進而好尚日端儉節成習而

國計日裕天

隆慶

聖旨詹仰莊奏內乃敢再照人君之體這斯等逆黨
次狂妄着錦衣衛拏在午門前着實打一百棍
為民不許黨護奏擾各監局科道大使部吏
只照舊行

欽差提督鴈門等關兼巡撫山西地方都察院右副都御史臣靳學顏謹

題為財用至急講求貴廣懇乞

申飭當事臣工協心共濟以祇承

明命事准戶部咨該戶科都給事中劉繼文等題前事該本部議擬恭候

命下本部催行在外撫按等衙門查照節次題奉

欽依內事理各據所見於凡財用有裨事體無碍可

以弘濟今日缺乏者無論巨細作速條列次第

上陳仍要人具一疏不許連名共奏止於塞責又不

可仍前遲延有辜

明命通候條議完日容臣等會集多官逐一再行酌
議覆請 宸斷施行等因覆奉

欽依備浴前來准此臣頃者覩時多事奮欲効諸臣
攄吐宵臆有所論

奏緣臣平生疎鹵不練世故又自十年以來衰病
日侵並將少時聞見遺亡殆盡今該部覆奉題
請責臣等以言臣既不容緘默必強所不能則惟有
迂誕之說或諸臣所已言而臣復為之竟其所
未悉者如斯而已其於

國計有裨萬一與否不敢必也臣不勝兢惕待罪
之至臣惟今日耗天下之財者天下之兵也而

邊兵不可以言耗即以山西論之以八百里之
邊而守以不滿五萬之卒無時不言脩無處不
言守無歲不罹虜患也即一意主戰或可言冗
然山西之計在守而不在戰雖城操老弱之軍
無不從事於脩築之役者若以其不在戰而汰
之則任戰者不多而脩築者無賴焉即如灰溝
一營今招軍十年矣尚不滿其半也故他鎮兵
或患冗山西兵獨患少至於山西軍糧原不及
數而軍士有逃亡馬匹有倒失故以不及數之
糧而餉不滿額之兵若歲無災傷而年例應時
早給則僅僅充足若軍滿其額則糧不盈筭矣

且民力有限譬言如血脉一有鍼銚之漏便成全
體之枯今養兵之費既不容已則自兵以外但
一力節省而已無徭役夫馬供給交際迎送之
類皆不必言至於詞訟一節今世目之為生財
之一術而不知此其為耗民之一孔也臣巡撫
衙門自數年前限解贓銀兩因攬受多詞臣愚
以為一省獄情有巡按臬司守巡主持於止有
郡縣有司分決於下民之冤抑者鮮矣若巡無
又加多事則官司紙贖一兩之入民間有十數
百兩之費不啻也贓罰所得能幾何哉臣等
受詞惟關軍情邊事地方利弊其餘民間

之競一切不行凡事關兩院者臣即於批詳中
委曲數語以省異同之擾故臣巡按賊罰從比
免辭可也臣於理則中單提詞訟為言者以民
間之詞訟正如有國家者之用兵一開釁端此
罷而彼不肯休心欲惜才而勢不由已此二事
最相同也今山西無礦可開無錢可鑄以鹽法
而通行矣屯田而盡闢矣以耕作則盡力矣財
用之詘乏日甚臣謂除節省外無策焉然談部
責臣等以言者蓋不止為山西計為天下計也
臣請陳其迂誕之說臣惟詩曰殷鑒不遠在
夏后之世天殷之所鑒者夏周之所鑒者殷則

今之所鑒宋也自太祖立國懲唐藩鎮遂欲盡去天下之兵故於

京師置禁軍十萬而天

下諸路總之亦不過十萬曰以

京師十萬而制一路有餘力焉當時曹彬潘美等所將以下江南平漢伐蜀威越皆禁軍也乃一再傳而西備益重此備契丹慶曆以來召募漸多至八九十萬治平以後又增十五六萬至熙寧以後又有女直之備而兵益不勝紀矣彼恃財用不言詘乏故佞人得以扇其豐亨豫大之說是宋之患不在乎理財以困民也而坐失駁戎之無策不獨夫駁戎之無策也而坐失上下

之苟安不獨其上下之苟安也而坐夫國是之
不定夫天下之患莫大乎上下之苟安也而宋
人恃之彼其元昊請和則舉朝稱賀契丹尋盟
則邊防鮮嚴敵計日密我圖日疎而不悟也莫
大乎國是之不定也而宋人忽之彼其世方無
事言官請繕洛陽則目為迂談戎及近郊廷臣
言和言戰則終日不決大計如此一者可知而
不悞也議者歸咎於王安石之理財夫敵強則
兵增兵增則食益欲不言利得乎而宋計又如
此即無安石未有能振之期也我朝自

成祖北征至於南望北斗虜弱極矣初非若宋人立

國之初即有契丹之鄰也東盡西極奄有諸險
又不若宋人之僅保中城棄險資敵也其始沿
邊一帶置兵不過四十萬人此後胡孽日滋叛
氓日起至今增兵益戍稍倍於前初不若宋人
之十倍其初也輿圖廣遠二百年來無彈丸黑
子之虧初不若宋之疆宇迫蹙也客兵雖增主
兵多缺初不若宋人軍餉之外又有歲獎輸鄰
餼錢賂敵也然而自嘉靖年間即言詘乏歲歲
講求而卒無一效何哉臣亦反覆思之而不得
其說於是乃以臆揆之曰宋人雖增新兵而天
下原無養兵之費我

朝海內皆兵民處其七以供舊軍之餉而新軍一切仰給太倉是舊軍之餉不減而新軍之餉日增其費一也前代惟周有豐鎬漢置南都率有其名而無其實也我

朝留都之設建官立衛稱兩京焉坐食公帑其費二也宋人宗室亦有王公之號而親疎繁狹或通名仕版或處民間我

朝分封列爵強支固本不農不仕啖民脂膏其費三也夫此三費者天下之大費也皆前代所無而我朝為獨盛焉又駸駸乎日增也賦歛安得不日急儲蓄安得不日匱哉今之計

宗室者形之章奏亦屢以煩而見之施為則病其
窒或中有機括此在樞軸之臣必有達於權而
通其變者非臣愚所能竟其說焉至於留都官
曹備設軍衛林立是否

聖祖垂統

列聖貽謀初意此在館閣之臣討論

綜覈必有得其詳而言其故者非臣愚所得預
其議焉臣愚惟有見於耗天下之財者在兵故
敢陳兵說以俟司計者擇焉夫天下之兵有四
曰邊兵曰京兵曰留都之兵曰腹內衛所之兵
此四兵者坐食則同而緩急之用異焉又其目
有五曰見伍曰召募曰徵調曰清勾曰充發此

力目者尺籍則同而名實之歸異焉然四兵之中邊兵為急何也戎狄日臨所以外捍而內恃之者非邊兵而誰乎京兵則居重馭輕彈壓四方耳故次之至於留都腹內之兵除駕運差撥京班做工之外無庸施矣五目之中召募見五為實何也應急齊事所與負材勁而當矢石者非召募而誰乎根生土著所與長子孫而充營伍者非見伍而誰乎徵調則虛彼實此但資擺守耳故曰次之至於清勾充發按冊則可觀責實則難必無益兵數而專取擾民矣夫惟邊兵為急而邊兵之中又惟見伍召募為實所謂新

增仰給太倉者正此輩也今為計者曰欲言理
財先裁冗食夫邊鎮自大小頭目以及督撫之
臣其見任在職者彼或為身謀或為利計姑無
聽其說試使曾見任在職而今罷去者令之熟
計而獻之曰某所居鎮兵誠多可損也食誠冗
可裁也如是而損其數裁其食何不可之有然
而臣知彼不敢為是說也其敢為是說者必其
人未嘗居是地者也誠使為計者知緩急之
用也而酌量於損益之間以緩之損而益之
如免班軍之役而徵價以解邊非一計乎
實之異歸也而通融於因革之際先其實

其名如省克發者解而量其等以折贖非一計
乎夫所貴乎兵者不謂其習號令閑技擊日走
演場而已謂其衝鋒對敵旗鼓相當乃兵之實
猶之医也不謂其明素難究岐黃議論風生而
已謂其臨榻對症起死回生乃医之實也今虜
視邊兵易與耳然邊兵猶有戰時而以殺人為
樂盜馬斬級之事接踵見焉不獨邊兵雖邊民
亦有奮死而一躍者何者彼固習見而數嘗之
雖濱死尚冀一生若他兵則不能耳是以邊兵
則易腹兵腹兵則易京兵京兵則易南兵謂其
終世皆不嘗寇皆不足恃也臣嘗有驗於此

請試言之臣每見海內但有山賊竊發之寇多不動
用官軍非陰匿難職則承二判簿以為之將非
鄉夫里保則義勇快壯以為之兵在北則有鹽
礦徒毛葫蘆角腦之僭在南則有南狼兵土官
之借觀正德辛未壬申之間劉賊起霸州無幾
豎子耳舉中原之衛所而不能當至不免於邊
軍之調是以有卽山之捷嘉靖中年倭寇發海
上五十餘人耳轉掠十餘府至於應天門外而
四十八衛者無一人出撓其鋒卒見夷於淮揚
民兵之手是以有振武營之設己巳之役腰
衛所尚實也而卒無一至此固年遠莫大之

也鄖陽有行都司漢中有衛所近日一何勉而
不能圖乃往返數千里外調邊鎮之兵以臨之
又么麼目前之驗也臣所言者非謂盡去腹內
之兵謂既名以兵當責以實欲責以實當試以
戰欲試以戰當限以輪番戍守之法彼其或遠
而不可使或弱而不願戍則優其身以自便而
移其食以解邊有事則按籍而徵之而饋餉一
出於官無事則任其自便而耕商無異於民要
之無事時多有事時少也而名籍屯牧居住部
署固在也人有恒言軍強民弱謂夫正屯之外
又兼餘地餘地之外又買民田差役不能干有

司不得制比夫民之輸筋胥竭筐篋終歲而辨
官捐親戚去墓墳隨地而占籍者相什百也臣
又見庚戌以來山東河南江北等處有檄皆創
募義勇餘者臣不知在山東者臣畧知之山東義
勇蓋六千人其始一名徵銀八十兩而民不堪
命今漸減至三十餘兩民猶以為病也而

國又無賴焉此盜去關門之計今皆不敢言去臣
愚以為既不敢言去試以六千人者分為二班
賣其馬之半而歸其值於官以其半而給三千
人者歲一上班其下班三千人者每名於正貼
戶下徵銀三之二貯庫而優免其身以自優遇

有徵發計日而與之銀其上班者來歲亦復下
班而交其馬於上班之人三年無事則計其所
貯以一年者留補不測以二年者解輸於邊其
河南江北等處亦復如是其於邊餉又一計也
臣又見天下腹裏民壯原非

祖宗舊制亦自己已以後始今不過充游手勾攝之
差官府掃除之役無事時多有事時少亦終歲
無戰鬪之事者臣

請亦如義勇分班之例其於邊餉又一計也故曰臣
非欲盡去腹內之兵以此兵二百年來而未嘗
見敵如邊兵之一年及偶一見敵而往驗又章

灼如此今乃與不可一日緩之邊兵同一坐食
焉孔子嘗言不得已而去兵今當去何兵不得
已而去食今當去何兵之食今日固不得已之
時也司權度者可容忽焉一不致較哉或曰懲
噎廢食不可夫是其食雖日一遇壹不可恃以
為療饑之資也若乃京兵臣言其次者非謂京
兵虛設無謂冗食無益也謂京兵依託輦轂丞
育 太平比夫邊兵之日臨鋒鏑瀕危亡者有
間也若乃求其實則京兵視邊兵乃以心視臂
主臨僕焉為係甚重今乃懷生顧養銷輟積弱
為邊所易也柰何望其控制四方以攝羗胡

蠻夷哉臣愚以為欲京兵強亦宜試以戰欲試以戰亦宜責以輪番戍守之法夫

京師去宣府薊鎮終數百里耳以京營九萬之卒歲以一萬而戍二鎮是九年而一成於京卒未為苦也不數年而戍徧而京卒之怯亦與邊兵同其勤矣又以

畿輔之卒皆親軍之兵矣夫出京卒以戍薊鎮則延固之費可省出京卒以戍宣府則宣府之勢益強宣府之勢益強而大同之氣自倍逆胡雖衆即敢扣吮巖而搖根本則畏宣大以全力而制其後京卒之勁當其前而仰攻深入之事

鮮矣臣所謂耗天下之財者在兵在京與邊猶當倍其數而責其實何敢言耗也乃若腹內

留都徵調清勾充發之兵則緩急名實居然拍掌之間通融斟酌斯其時已適今不為臣見夫內外並耗三費交加而區區於今日罷一役明日裁一貪洩之以尾間而益之以啖澮也何益於計哉臣又見近世之言理財者曰財無從生也惟有節費而已臣愚竊謂前代生財之法較之今日尚缺一大政焉誠舉此一大政何謂其無從生哉而錢法是已臣聞人之所由生衣食為大王者利用厚生必先乎此此出於天時地利人

力相待而成三才之用者也有此三才即有此
布帛五穀增虧相乘有無相貿而非有水旱之
災兵革之奪醵疫之妨以一年之歲功而供一
年之日用自周也今天下之民愁居懾處不勝
其飢寒之慘司計者日夜憂煩遑遑以匱乏為
慮者豈布帛五穀不足之謂哉謂銀兩不足耳
夫銀者寒之不可衣飢之不可食又非衣食之
所自出也不過貿遷以通衣食之用耳而銅錢
亦貿遷以通用與銀異質同神者猶雲南不用
錢而用海色三者不同而致用則一焉今獨柰
何用銀而廢錢惟時天下之用錢者曾不什一

而錢法一政久矣其不舉矣錢益廢則銀益獨
行銀獨行則豪右之藏益深而銀益貴銀貴則
貨益賤而折色之辦益難而豪右者又乘其賤
而收之時其貴而糴之銀之積在豪右者愈厚
而銀乏行於天下者愈少再踰數年臣不知其
又何如也則錢法不行之故耳言計者又欲開
礦夫礦不可開開無益也一禁而不可弛弛則
亂也臣試根極錢說而司計者擇焉臣聞錢者
泉也如水之行地中不得一日廢者一日廢則
有枯槁之虞從成周兩漢唐宋以來見之史一
一可觀未有用銀費錢如今日之甚者也而用

錢之多鑄錢之盛者尤莫如宋太祖欲積錢至
五百萬而贖山後諸郡於遼靖康中趙良嗣奉
使歲加稅銀一百萬於金其平時賂契丹寧夏
也歲幣率有常額其外國亦用錢可知又宋之
饒州處州江寧等處皆其鼓鑄之地今江南人
家嘗有發地得窖錢者則無南北皆用錢可知
其餘書史所常言無慮鉅萬累鉅萬之說率多
以錢計臣亦不暇枚舉今去宋不遠天宋用錢
則民生日裕鑄錢則國用益饒此裁成輔相之
業惟人主得為之故曰聖人之大寶曰位因位
而制權因權而制用故又曰錢者權也人主操

富貴之權以役使奔走乎天下故一代之興則制之一主之立則制之改元則制之軍國不足則制之此經國不易之一大政也奈何廢而不舉臣竊聞江南富室有積銀至數十萬兩者今皇上天府之積亦不過百萬兩以上若使銀獨行而錢遂廢焉是不過數十富室之積足相敵矣

皇上試一舉其權而振之則彼富室智勇忠義將奔走於吾權之不暇彼敢冒萬死而盜錢乎一文者哉故曰權也權者立之乎無形而通之于無窮用之則天下舉有求於我而有餘不取之曰擾民焉以求之於天下而不足為驗甚明也

且夫富貴其權一也

皇上今出數寸之符移片紙之檄以匹夫而拜將相
焉又能使同姓王異姓侯焉於公帑未有損也
此馭貴之權若是乎其易也若乃今日與人以
千金焉明日與人以萬金焉曾不踰年而太倉
告匱矣夫何馭富之權若是乎其不侔與誠以
有其權而不用與無權等耳昔漢文帝之寵鄧
通也曰吾能富之賜以蜀山之銅而鄧氏之錢
滿天下夫鄧氏之錢滿天下則天下之貨萃於
鄧氏明矣吳王濞擅鑄山之利而輒稱兵與漢
廷抗亦不過竊漢廷之權明矣以竊一日之權

尚足以得民而抗漢况以

萬乘而自振其權可勝用哉今之為計者謂錢法之難有二一曰利不酌本所費多而所得鮮也臣愚以為此取效於旦夕計本利於出入蓋民間之筭非

天府之筭也夫

天府之筭以山海之產為材以億兆之力為主以修潔英達之士為役果何本而何利哉此所謂本猶不免用銀之說爾臣所謂本蓋無影之權是已何則鑄錢之須一曰銅料一曰炭一曰轉致一曰人工夫此四者在民間計之銀一分而得

錢四文誠十不酹五矣自臣愚計之皆可不用
銀而取辦者誠將天下出產銅料之處贖軍徒
以下之罪而定其則以收銅於西山產煤之窖
以法司有罪之人而准其罪以納炭其運銅則
通水路者附以官民之舟如臨清帶輓之例通
陸路者資以驛遞之力而給之官庫之錢其運
炭則

請出府庫見貯之錢或於京城或於近縣或於營軍
如係官則量給以上食如係民則平給以腳價
如是而患無材與夫轉致之難臣不信也至於
人工取之見後而皆足則又不煩銀兩而可辦

也臣不知工部及

寶源局原額匠役若干見今坐食與否即以營軍
九萬人論之油用其一二千人足矣而謂妨訓
練耶今京城之而設金刺綉聲技力作之徒與
夫靠衙門而衣食者孰非營軍奚啻一二千也
而未嘗患其妨凡此皆不用銀而可以成務固
無本利之足較矣其二曰民不願行強之恐物
情之沸騰也臣愚以為歷代無不用之至稱為
錢神我

先朝又用之祇見其利不聞其病正德嘉靖以前
盛行之蓋五六百而值一兩今七八十歲人固

多尚可一

召而訊也獨至於今屢言而屢廢甫行而輒輟何哉臣竊詳之錢比鈔異於小民無不利也獨所不便者奸豪耳一日盜不便一日官吏為奸不便一日商賈挾持不便一日豪家蓄藏不便此數不便者與小民無與也臣竊聞往時但一行錢法則輒張告示戒厥衛不先之於賣菜之傭則責之以荷擔之賤彼愚而相煽既閉匿觀望之不免而奸商豪右依託城社者又從旁簧鼓之以濟其不便之私一日而下令二日而閉匿不三四日而中沮矣務大計者宜若是其易動

哉臣聞施恩澤者自無告始行法令者自貴近始豈惟貴近自

朝廷始可也

請自今以後追紙贖者除折穀外而責之以納錢上
事例者除二分納銀外而一分以納錢存留戶
口則兼收錢穀商稅課程則純用收錢此謂自
朝廷始又因而賜予之費

宗室之祿百官之俸則錢銀兼之又因而驛遞應
付雇夫雇馬則惟錢是用又因而軍旅之餉則
分其主客量其遠近或以代布花或以充折
此謂自貴近始夫此數者有出有入而民間

底滯之患誠以上下交會血脉流通故也輕歛輕散官府有餘積之藏誠以正賦之銀既無減於常額而一切之費又取辦於一權故也此權不可行之於天下以啓盜權之釁

請於寶源局或西倉專設侍郎或用左右侍郎一員督於上以十三司員外或主事分理十三省事於下以科道各一員監之銅科工材各有職掌各省歛散各照分司先之以區畫條議計定而行而又輕重適均無駭於俗仍以唐宋以來舊錢兼之或

上有施於下有納於

上著之以必行之今遲之以歲月之效义之而本末兼利公私循環可以輟鼓鑄之勞而罷工作之使矣臣愚不揣竊謂千慮一得也昔我

聖祖初制鈔時下令甚嚴有以金銀貨物交易者輒沒給告者然不徒責之下也後又

令各處稅糧課程賊罰俱准折收鈔則

聖意淵微可測矣此固血脉流通之意所謂泉也而法以佐之所謂權也夫

帝主以元氣為橐籥以造化為錘鑪而風行神運不言所利乃至與齊民贊堅美本利較鍊鑄臣愚非所望也臣又聞之邊鄙強固則夷狄怵服中

原又安則邊鄙傾嚮故中原者邊鄙之根本也
百姓者中原之根本也衣食者百姓之根本也
閭閻之細有終世無銀而不能終歲無衣寧終
歲無衣而不能終日無食今百司夙夜區畫不
遑者乃在銀而不在穀臣竊慮之夫以

國家建都於燕東極齊西盡秦南阻江淮

神鼎之重

金甌之固此萬世不拔之業也而臣竊有慮焉何哉
誠以

京師北據幽都更無郡縣而宇在強狄雖有東齊
西秦其形勢皆不足以扼中原而自固

京師以南絕無名山大澤之限強藩與國之資

皇上南面而臨之所恃以為腹心股肱之重者惟河
南山東江北裏八府之人心耳此數處之人率
驚悍而輕生易動而難戢游食而寡積者也一
不如意則輕去其鄉一有所激視死如歸臣固
觀之熟矣八府遭歉則走山東山東遭歉則走
江北又未已也匹夫作難而千人響應往事蓋
屢驗之然其弭之之計無他不過曰恤農以繫
其家足食以繫其身聚其骨肉以繫其心而已
今試移文於此數處者而覈其官舍之所藏每
郡得穀十萬焉則司計者可安枕而無慮矣得

三萬烏猶可以塞轉徙者之望設不滿萬烏真
寒心哉臣竊意其不滿萬者多也即有水旱何
所賴烏即有師旅之興何所給烏臣觀自古中
原空虛未有如今日者也漢以前有廩倉隋以
前有洛口倉唐有義倉宋有常平倉皆隨地而
貯不專

京師今徐臨德州皆有官倉本為寄囤至於存積
幾何哉臣近日有疏為山西積穀荷蒙

皇上通行各省臣非不知以用賢為榮而所患者人
意向不同或行之不力或施之無序輒以為無
益有損烏臣且不堪任其咎也臣前疏謂一曰

官倉蓋發官銀以糴者此必甚豐乃可以舉一
曰社倉蓋收民穀以充者此雖終歲皆可以行
臣知中原空虛不但穀少而銀亦甚少其官倉
一節今歲已不能舉又聞有災變則社倉一節
今歲亦不能行但能以今歲始講求其條件加
意於積儲即明歲舉而後歲效未晚也此二倉
者社倉舉之甚易而效甚捷然非官府主持於
上則其事終不能成矣社倉即義倉也蓋始於
漢耿壽昌而盛於隋長孫平唐戴胄之徒唐又
最盛計天下積至數十萬以上及推其以唐義
倉之開每歲自王公以下皆有入是以甘肅獨

多臣所謂法令之行自貴乎德在實則准各民
正稅之數於二十分而取其一以爲社舍蓋富
者必田多田多則稅多稅多則社入多亦唐意
也要之其出也則中歛賑極貧大歛賑中戶又
大歛烏乃沾及於富室所謂恩澤之加自無告
始也今之言官倉者今年曰倉無銀烏明年曰
庫無銀烏如是除八分紙贖之外無幾耳言社
倉者此曰官戶當優免彼曰役占何科擾我也
又曰我不願賑於後亦不願出於今也如是不
過貧民下戶之輸無幾耳是二法終不可行而
中原之空虛如故也夫民之飢也必至於轉徙

轉徙不已必至於盜盜必先諸官戶與夫役占有力之家而此輩多不悟官府主持而鼓舞之終空言耳臣

請下之各省以唐宋歛穀之法為則而就土俗合人情占歲候以通其變限明春以裡盡報各府已前見貯之數以品其虛盈於明年冬至禾通計一歲二倉新收之穀以驗其功能著而為令歲歲脩之在官倉者時其豐歉而歛散之利歸於官若民有大飢則以賑之在民倉者時其豐歉而歛散之利歸於民雖官有大役亦不許以此藏於富民即藏富於官

皇上所為南面而恃以無恐者其根本在此今之言計者不憂穀之不足而憂銀之不足夫銀實生亂穀實弭亂銀之不足而泉代之五穀不足則孰可以代者哉故曰

明君不寶金玉而寶五穀伏惟

聖明垂意臣本腐儒不勝其懇懇愚忠每所陳說多從迂誕又不知其可否冒萬死至瀆

天聽伏望

皇上勅下該部再加採擇可行則行有當圖之以漸而勿驟有當斷之以必然而勿撓不可行則罷其議臣亦仰塞明詔少緩期會之罪臣不

勝幸甚

隆慶四年正月二十八日奉

聖旨戶部看了來說

巡按陝西監察御史臣蕭廩謹

題爲懇乞

聖明廣延群策豫處

國計以保邊

圉以永治平事臣奉都察院劄付一道內開戶

科給事中雖遵題前事戶部覆奉 欽依行令

臣等條陳理財事宜在外限三月以裏到部欽

此財用誠爲 國家大計詘乏誠爲今日深憂

科部題覆誠爲救時忠言 聖明欽依誠爲

經國至意臣子於此苟有一得之愚自當百拜以

獻矧煩勅限開導敢自任情緘默乎願臣待罪言諾

一年有餘矣先該戶科都給事中劉繼文題行

會議臣時不能一言非不能言也竊嘗攷理財

一事由嘉靖中年以來諸臣之題請部臣之議覆不知凡幾矣自今觀之果無一之不行者乎即如今年群臣之條陳部議之條件不知凡幾矣自今觀之除臣等所奉清理邊費而外果有一之見行者乎夫上有求言之意下有盡言之臣而事靡成功國鮮實效何也毋亦事關重大者不敢言故所言類皆瑣細而不足行與言涉貴近者不得行故所行類皆委隨而不能遂與引前事以觀其效良可觀矣則雖使白圭持籌計然畫策臣亦竊疑其無益何也苟無神輸鬼運之謀則亦竟爲盈庭築舍之空也

事屢陳不無條貫錯雜一年屢議不無事體周章徒使全盛之世屢揚朝不謀夕之聲

聖明之朝數蒙言不能行之議故臣之不言非敢自異諸臣竊以爲道謀可省而國體尤所當重也況天地生財本有此數今日雖云困訕之極百費未能悉充然苟力持節省之心要以數年亦當漸復至其所爲節省亦豈必多言哉惟在聖明再加之意而已

陛下誠弘投珠抵璧之風益嚴匪頒好用之式常存爲天下守財之念時廛四海困窮之懷則慈儉之寶自足以格臣民之心而凡內外之蠹穴倖

門自將改絃易轍共圖節省以仰符

聖心矣所出日省則所入日增浮費日省一分則

內帑日增一分固必然之理也欲求長策又孰有
大於此者乎且內帑之一金郡邑之百金也
郡邑百金之供閭閻十家之產也

陛下誠爲內帑惜其一金即爲郡邑省其百金亦
即爲閭閻全其十家矣慈儉發於一念覆育
徧於萬民以裕國計而所以培

國脉者胥此得之又何事於他求耶此則微臣所
知亦臣之所欲言者也外此則非臣所知亦非
臣之所能言者也臣嘗逮事先帝又嘗蒙

恩任使查刷光祿錢糧豈不知

陛下用費節省比之嘉靖年間十減六七然猶狂瞽
冒昧以是爲言者以爲 聖性恭儉誠視

先帝有光而所遭時勢則與 先朝迥異 先帝藉
累朝豐裕之積又適四海殷盛之時故雖四十年興
作尚可支吾而一時群臣凡遇取用亦自不必
爭執此非會計之得人臣之順乃時勢之易也
陛下雖承 累朝熙洽之餘實當 先朝匱乏之後
自非萬分節省不可康濟故一有取用則當事
諸臣未免冒昧執奏此非會計之失人臣之逆
乃時勢之難也

陛下誠不以得失而責計部不以順逆而疑諸臣一
洞察於時勢難易之間而理財之長策自可立見有
不必群臣之屢言不已者矣此尤微臣一念愚
忠所欲為

陛下言之者亦未必非科臣部臣之所欲言者也伏
乞

皇上軫念時艱 留心 國計 赦臣狂瞽

鑒臣血誠少 賜省錄而力行之焉 宗社幸甚生
民幸甚臣干冒 威嚴無任激切懇祈之至

萬曆五年正月題奉

聖旨戶部知道